

COST PROJEKT

Program COST je međuvladin okvir za evropsku saradnju u oblasti naučnih i tehnoloških istraživanja. Cost je program projektne saradnje na temeljnom istraživanju od općeg interesa radi stvaranja zajedničkih standarda za cijelu Evropu uz finansiranje na nacionalnom nivou.

Web stranica je: www.cost.esf.org

*** Prijava projekta**

COST se provodi putem akcija (akcije su ustvari projekti). Akcije su mreže koje povezuju nacionalno finansirane istraživačke projekte iz određenog područja, u koje je uključeno najmanje 5 (pet) sudionika iz različitih država članica. Akcije su definirane u Memorandumu o razumijevanju potpisanom od strane vlada koje žele da sudjeluju u određenoj akciji. Trajanje akcije je obično 4 godine. Povećan broj COST akcija odražava uspjeh COST-a u Evropskoj naučnoj zajednici.

Projekt mogu prijaviti naučne i obrazovne institucije. Kako je 2008. godine u pozivu objavljeno da se prijavljuju projekti u području obrazovanja, u područje prijave bi se trebalo navesti na koje područje obrazovne vertikale se odnosi prijava (predškolsko, osnovno,...., visokoškolsko, cjeloživotno).

Otvoreni poziv traje do 27. 03. 2009.

*** Vrste projekata**

U vrijeme osnivanja naglasak je bio na područja telekomunikacija, informatike, prometa, materijala, oceanografije, meteorologije i okoliša. Današnje inicijative se okreću sljedećim naukama:

- Biomedicina i molekularne bionauke
- Hemija i molekularne nauke i tehnologije
- Menadžment zaštite okoliša
- Hrana i poljoprivreda
- Šume, njihovi proizvodi i usluge
- Pojedinci, društva, kulture i zdravlje
- Informacijske i komunikacijske tehnologije
- Materijali, fizika i nanotehnologija
- Transport i urbani razvoj
- Ostalo

*** Finansiranje projekta**

Koordinacijske aktivnosti i rad tijela unutar COST programa finansira se na temelju ugovora između Evropske komisije i Evropske naučne fondacije. Ti troškovi se pokrivaju sredstvima iz specifične programske linije unutar Okvirnog programa.

Istraživanja finansiraju same zemlje koje sudjeluju u projektu, a rezultati istraživanja zajednički su svim učesnicima u projektu. U pravilu, radi se o projektima koji su od zajedničkog interesa više zemalja ili pak od općeg interesa, odnosno od interesa radi stvaranja zajedničkih standarda za cijelu Evropu. Prednost saradnje u okvirima COST-a je i u činjenici da se ravnopravnom saradnjom na projektima stvaraju uslovi za sve ostale oblike međunarodne saradnje, a nacionalni programi se povezuju sa istraživanjima u Evropi i svijetu. Finansira se povezivanje istraživačkih aktivnosti koje su finansirane nacionalno, pa se sredstva mogu dobiti za sastanke, konferencije, kratkotrajnu naučnu razmjenu i slično. COST ne finansira sama istraživanja, pa COST

akciju dobro je kombinirati s nekim drugim projektima koji osiguravaju sredstva za istraživanje.

U odnosu na domaće projekte, međunarodni projekti su bolje finansirani, ali zahtjevaju veći angažman kod prijave i provedbe projekta.

Sredstva koja daje COST su povezana sa FP7 i iznose manje od 1% ukupne vrijednosti Akcija. U okviru FP6, sa oko 20 miliona €, putem COST program umrežavanja je uključeno preko 30 000 evropskih naučnika, sa svojim projektima koji premašuju vrijednost od 2 miliona € godišnje.

Sredstva za COST predviđena FP7 programom (2007 – 2013) iznose 210 miliona €, uz mogućnost dobivanja dodatnih 40 miliona, ovisno o rezultatima izvještaja 2010. godine.

*** Traženje partnera**

COST je otvoren ka svim zemljama članicama Evropske unije, kao i zemljama kandidatima, također podržavaju zemlje susjede, naročito istočno od Evropske unije i zemlje mediterana. COST poziva istraživače širom Evrope da podnesu prijedlog za istraživanje mreže i da koriste jedinstvenu priliku za razmjenu znanja

*** Saradnja**

Radi se o naučnim programima sa naglaskom na saradnju naučnika i njihovoj mobilnosti pa se prema tome i većina sredstava troši za te namjene. Saradnja je na polju naučnih i tehničkih istraživanja tako da povećava evropsku saradnju na tim područjima.

*** Ideje**

COST akcije su provođenje istraživanja timova za jačanje temelja za izgradnju naučne izvrsnosti u Evropi. Ovaj poziv je kontinuirano tematski otvoren. On poziva na prijedloge novih COST Akcija koji doprinose naučnom, privrednom, kulturnom i društvenom razvoju Evrope. Ideje drugih evropskih programa u koje su uključene mnoge mlade grupe istraživača su posebno dobrodošle.

*** Osoblje**

Mogu biti grupe istraživača, a mogu se uključiti i kao individualni eksperti, kao i pomoćno osoblje koje obavlja rutinske poslove većeg obima.

*** Kapaciteti**

COST je jasno pokazao svoj značaj u nekompetitivnom istraživanju, prenormativnoj saradnji i u rješavanju okolišnih i prekograničnih problema i problema komunalnih usluga. Uspješno je korišten za maksimiziranje evropske sinergije i stvaranje dodatne vrijednosti u istraživačkoj saradnji i efikasno je oruđe za unapređenje evropske integracije.